

Un Tributo na mi ruman

Harold Harms en conmemoracion di 3 aña di su morto

Skirbi pa Clyde Harms

STORIA di mi ruman Hato ta un storia di forsa di boluntad, curashi, perseverancia y balor moral.

Un atardi na september 1946 Hato a bira victima di e prome hit-and-run den historia di Aruba y cu nunca a wordo solucionada.

Un cantidad grandi di weso a keda kibra den henter su curpa y pa mas di un siman el a keda den un coma na Hospital San Pedro.

Aki Hato a cuminsa su tribulacion medico cu lo dura mas di 5 aña y rekeri mas di 30 operacion na tres pais.

Segun dr. Schlageter, e ciruhano cu a oper'e, si no tabata pa Hato su forsa, e lo no a scapa. No cabe duda cu Hato, na edad di 20 aña, tabata den condicion fisico optimo.

El a caba di bolbe di Puerto Rico caminda el a sirbi un poco mas cu un aña den ehército Mericano y a keda eligi pa hunga den e ekipo Puerto Rico Army Basketball All Stars.

Despues di varios operacion y algun luna na San Pedro, Hato por a bay cas pa warda te ora cu e ciruhano por oper'e atrobe, pero e no por a lanta fe'i cama.

Nos tata a compra tur cos cu e tabatin mester pa haci su bida mas tolerabel. Hato a haya un radio band'i su cama y asina nos tur tabata sinta rond di su cama pa scucha noticia, transmision di weganen di baseball di Cuba, Venezuela y Santo Domingo.

Nos tabata su compañe y su nurse. Ora cu e mester orina nos tabata trece e pato p'e y ora e mester bay af nos tabata pone e panchi y trece papel despues p'e limpia su curpa.

Den tur su sufrimiento fisico y psicologico Hato nunca a keha of busca compasion. Al contrario, Hato tabata determina cu e lo recupera.

Entre tanto, American Legion di Lago Colony a tende di e situacion di Hato y nan a percura pa Hato sigui su tratamento na San Patricio Veterans Hospital na San Juan.

Despues di mas di dos aña y un cantidad di operacion na San Patricio, Hato por a bin cas atrobe prome cu e sigui su tratamento medico na Veterans Hospital di Coral Gables.

Hato su brasa drechi a keda casi completamente destrui, pero e ciruhanonnan cu hopi pasenshi a drecha lo ke cu tabata posibel ainda. Naturalmente, cada biaha cu nan traha riba Hato tabata otro operacion intrusivo cu tur su

consecuencianan.

E weso bou di rudiya di Hato su pia robes a kibra na werki, pero pida pa pida e ciruhanonnan a logra di saca tur, pero pa hopi aña Hato mester a bisti un sapato cu brace di metal cu tabata yega te na su rudia pa no pone mucho peso riba e weso. E pia a keda casi 3 cm mas cortico, pero e sapato tabata compensa p'e diferencia.

Durante tur e operacionnan y tambe durante e periodo largo di recuperacion cu a sigui, Hato a muestra curashi y forsa di boluntad.

Solamente un biaha, den mas di 30 operacion, e dolor y sufrimento tabata asina fuerte cu Hato a perde fe y el a roga e ciruhano pa corta su pia afo, pero esaki naturalmente no a sosode. Siguiendo un plan di terapia fisico cu tambe lo dura añanan largo, Hato a muestra perseverancia.

Aunke Hato a keda cu hopi defecto fisico, e no a laga esaki stop e di haci deporte atrobe. E no a entrega! Basketball, su sport faborito e no por a hunga mas, pero na 1949 cu e ekipo di Antiyas Hulandes a bay hunga na Guatemala, Hato a bay di coach.

Su otro sport stima, softball, milagrosamente el a bolbe hunga. Y el a hung'e bon!

Pa nos cu a mira Hato drumi den cama pa tanto aña, tabata un satisfaccion y alegria pa wak con e tabata bati y core e basenan atrobe. Un milagro?

No, esaki tabata resultado di Hato su atitud positivo, su lucha duro y tenacidad.

Tempo e tabata mucha Hato a zeil hopi den canoa den Lagoen di Playa, awor el a siña "sunfish sailing" y despues di poco tempo, e tabata reconocí entre e mihornan na Aruba. Apesar cu su brasa tabata hopi destrui, Hato a siña bowling y hungando pa Club Caribe y pa Esso Club, el a bira un di e top bowlers di Aruba.

El a representa Aruba den varios competencia internacional y Club Caribe a reconoce Hato pa su contribucionnan n'e club nombrando e Miembro Honorario.

Hato a muestra cu nos nunca mester entrega. Cu su esfuersonan enorme el a vence un handicap grandi y sobresali compitiendo cu otronan cu nunca a sufrí adversidad

Na 1959 Hato a bira miembro di Lodge El Sol



Hato ta anota careda pa gana e wega!
Despues di pasa mas di cinco aña den hospital na Aruba, Puerto Rico y Coral Gables, Hato cu su enorme forsa di boluntad a vence tremendo handicap y a bira un deportista atrobe, hungando softball y sobre-saliendo den bowling y sunfish sailing.



Hato dilanti di Veterans Hospital San Patricio na San Juan, PR prome cu un otro cirugía na su pia.

Naciente, y despues di su famia, Masoneria a bira su di dos amor.

Te un poco tempo prome cu el a muri, Hato a keda activo den su Logia stima. El Sol Naciente a reconoce Hato su bon trabou cu miembrecia honorario na 2004 y na 2009 Hato a ricibi e medaya di 50 aniversario como miembro.

Como un bon Mason, Hato a muestra rectitud incondicional den tur loka e tabata haci; na su trabou y cu su amigonan e tabata conoci pa su honestidad y su compasion p'esnan di menos recurso.

Hato su grandeza tambe tabata den su incapacidad di causa daño na ningun persona y su disposicion di pordona esnan cu a traicion'e y perhudic'e.

clydeharm@yahoo.com